

Samostalna zastupnica - Elza Gaković

Sarajevo, 29.12.2025. godine

ZA:

Vlada Kantona Sarajevo

Ministarstvo zdravstva Kantona Sarajevo

Ministarstvo za odgoj i obrazovanje Kantona Sarajevo

U skladu sa članom 106. i 213. Poslovnika o Skupštine Kantona Sarajevo, dostavljam:

INICIJATIVA

Za uvođenje Protokola o postupanju sa djecom oboljelom od dijabetesa tip 1 (DM1) u predškolskim ustanovama Kantona Sarajevo / JU "Djeca Sarajeva"

OBRAZLOŽENJE

Dijabetes melitus tip 1 (DM1) predstavlja hronično oboljenje koje sve češće pogađa djecu predškolskog i školskog uzrasta. Nažalost, svjedoci smo kontinuiranog porasta broja djece oboljele od dijabetesa, zbog čega se s pravom može reći da je dijabetes bolest sadašnjosti, ali i budućnosti.

U tom kontekstu, posebno je važno osigurati adekvatnu zaštitu, sigurnost i inkluziju djece oboljele od DM1 u svim segmentima odgojno-obrazovnog sistema, a naročito u predškolskim ustanovama, gdje djeca provode veliki dio dana i gdje su u potpunosti oslonjena na brigu odraslih.

Edukacija odgajatelja i medicinskih sestara predstavlja ključni korak u tom procesu. Bez obzira na to da li u određenoj predškolskoj ustanovi trenutno borave djeca oboljela od dijabetesa ili ne, smatramo da je neophodno da svi uposlenici koji su u direktnom kontaktu s djecom prođu osnovnu edukaciju o dijabetesu tip 1. Razlog tome je jednostavan – dijabetes ne bira vrijeme ni mjesto, a pravovremena i pravilna reakcija može spriječiti ozbiljne zdravstvene posljedice i spasiti život djeteta.

Iz tog razloga iniciram **uvođenje jedinstvenog Protokola o postupanju sa djecom oboljelom od DM1 u vrtićima Kantona Sarajevo**, koji bi jasno definisao:

- obaveze i odgovornosti odgajatelja, medicinskih sestara i rukovodstva ustanova,
- osnovna pravila praćenja stanja djeteta (prepoznavanje simptoma hipoglikemije i hiperglikemije),
- postupke u hitnim situacijama,
- način saradnje sa roditeljima i zdravstvenim ustanovama,
- obaveznu i kontinuiranu edukaciju uposlenika.

Uvođenjem ovakvog protokola Kanton Sarajevo bi poslao jasnu poruku da prepoznaje potrebe djece sa hroničnim oboljenjima, da ulaže u znanje svojih uposlenika i da gradi inkluzivan, siguran i savremen sistem predškolskog odgoja.

Ova inicijativa nije samo pitanje zdravstvene zaštite, već i pitanje prava djeteta, jednakih mogućnosti, odgovornosti društva i povjerenja roditelja u sistem koji brine o njihovoj djeci.